

鍊之九轉而曰靈丹劉安王以童子小便鍊之七轉而曰還丹是知靈聚而爲神神散而爲虛以炁還元而曰還丹後人用之亦有見功昇仙者蓋始也鍊之而內事兼修內外俱成得通仙道若以外藥獨用氣弱神衰天地秀炁不能停留返爲害不細矣

真鉛汞

玄洞玉詔曰昔廣成子教黃帝鍊外丹方有鉛汞之物凡以內事爲法則也人之初生先生腎也腎爲北方壬癸水在五金而爲鉛次生心也心爲南方丙丁火在八石而爲砂鉛中取銀如腎氣之中暗藏真一之水砂中取汞如心炁之中暗藏正陽之

道藏輯要

羣仙會真記

全

翼集九

炁蓋以外鉛中銀而合砂中汞自然成砂火候合宜煅成大寶取類於人則腎炁之中取真一之水心液之上取正陽之炁二物合而爲丹乃如外物見寶之比也傳道集曰抱天一之質而爲五金之首者黑鉛也鉛以生銀鉛乃銀之母感太陽之炁而爲眾石之主者硃砂也砂以生汞汞乃砂之子難取者鉛中之銀易失者砂中之汞鉛汞若相合煅煉自成寶此鉛汞之理見於外也若以內言之父母真炁合而爲一卽精血爲胞胎凝結爲內腎內腎者鉛也及夫腎中生炁炁中生水以腎水合心液之上正陽之炁凝結於黃庭而爲丹則曰真鉛也以腎炁合心炁積炁生液結爲玄珠方還下丹田而曰汞也及夫丹就真炁

升腎炁入頂而真水降一升一沉於十二樓前而爲既濟既濟一次而還下丹田故曰真汞也元皇君訣曰鉛汞鼎中居燒成無價珠都來兩箇字了得萬家書正一真人曰鉛汞傳來幾萬秋幾人悟得幾人修若教此理常人會塵世神仙似水流呂公曰金丹一粒定長生須得真鉛鍊甲庚火取南方赤鳳髓水求北海黑龜精古今上聖稱說鉛汞之理不同其來止於鉛爲腎而真鉛爲丹汞爲心液而真汞爲藥真鉛真汞爲既濟若憑外說不可中理矣

真陰陽

九天秘錄曰一陰一陽之謂道陰陽不測之謂神物中神而大

道藏輯要

羣仙會真記

全

翼集九
XXII

者天得一陽以守乾道地得一陰以守坤道物中神而明者日得一陽魂以道應月得一陰魄以道致故夏至一陰自天來若無真陽萬物死也不能焦枯冬至一陽自地升若無真陰萬物生也不能滋潤也日有真陽陽燧感而火出月無真陰故方諸取而水絕此天地日月至大至明真陰真陽豈人之不若是乎西山記曰腎水也水中生炁名曰真火氣中暗藏真一之水是陰中有陽陽中有陰也心火也火中生液名曰真水液中暗藏正陽之炁是陽中有陰陰中有陽也三華者三陽腎氣乃陰中之陽丹中真炁則真陽中之陽也心液之炁乃陽中之陽不說三陰也所貴陰盡陽純矣